

Ffocws ar Bennu Ffiniau Graddau



Pan fydd y marcio wedi'i gwblhau, mae'r broses ddyfarnu yn dechrau, lle y pennir ffiniau graddau ar gyfer arholiadau, gwaith cwrs ac asesiadau dan reolaeth. Nod y broses ddyfarnu yw sicrhau y cynhelir safonau o flwyddyn i flwyddyn. Mae byrddau arholi yn defnyddio pwyllgor dyfarnu, yn cynnwys grŵp o uwch arholwyr sy'n arbenigwyr yn y pwnc hwnnw, i gynnal y broses ddyfarnu.

Pam bod ffiniau graddau yn newid?

Mae byrddau arholi bob amser yn anelu at ddatblygu papurau cwestiynau gyda'r un lefel o anhawster o flwyddyn i flwyddyn. Yn amlwg byddai'n annheg i fyfyrwyr gael gradd is oherwydd eu bod wedi sefyll papur mwy anodd. Fodd bynnag, mae'n anodd iawn (bron yn amhosibl) cynhyrchu papurau arholiad sydd yr un mor anodd â'i gilydd. O ganlyniad, ym mhob cyfres arholiadau, pennir ffiniau graddau newydd ar gyfer pob papur arholiad, gwaith cwrs neu asesiad dan reolaeth. Dyma pam y gall ffiniau graddau fod yn wahanol bob blwyddyn ac ar gyfer pob arholiad.

Pennu ffiniau graddau

Ffiniau graddau yw'r marc lleiaf sydd ei angen ar gyfer gradd benodol. Er enghraifft, mae ffin C o 50 yn golygu bod angen 50 o farciau arnoch i gael gradd C. Pennir ffiniau graddau ar ôl i'r arholiadau gael eu heistedd, ac er o bosib bod gan bob cyfres arholiadau ffiniau graddau tebyg, maent yn annhebygol o fod yn union yr un peth bob tro.

Unwaith y bydd yr holl farcio wedi'i gwblhau, bydd y pwyllgor dyfarnu yn cwrdd i argymhell ble i bennu ffiniau graddau eleni. Mae angen i'r pwyllgor dyfarnu gydbwysu ystod o dystiolaeth wrth benderfynu ble i argymhell y ffiniau graddau. Yn arbennig, mae'n rhaid i'r argymhellion ystyried cydbwysedd dystiolaeth ystadegol a barn arholwyr am waith myfyrwyr.

Mae'r pwyllgor yn ceisio dod o hyd i'r marc ar gyfer gwaith eleni sy'n adlewyrchu orau y safon y pennwyd ffin graddau y llynedd arni. I wneud hyn mae'n edrych ar waith myfyrwyr o eleni ar y ffin graddau arfaethedig ac yn ei gymharu â gwaith myfyrwyr y llynedd a oedd ar y ffin graddau. I wneud cymhariaeth deg, mae angen i'r pwyllgor wybod a yw'r grŵp o fyfyrwyr a wnaeth sefyll yr arholiad eleni yn debyg i'r grŵp a wnaeth ei sefyll y llynedd yn gyffredinol. Mae'n defnyddio ystadegau am nodweddion y ddau grŵp o fyfyrwyr i wneud hyn, megis oed a pherfformiad mewn yr arholiadau. Mae'r pwyllgor dyfarnu hefyd yn derbyn gwybodaeth ystadegol am yr arholiadau eu hunain. Mae hyn yn cynnwys dadansoddiad

o farciau mae'r myfyrwyr yn eu cyflawni ar bob cwestiwn unigol ac awgrym o ble y gellid pennu ffiniau graddau i gyflawni deilliannau cyffredinol tebyg i arholiadau y llynedd. Mae'r pwyllgor yn defnyddio'r math hwn o dystiolaeth er mwyn helpu i lywio ei benderfyniadau, yn enwedig pan fydd newidiadau i gymwysterau.

Pan gaiff cymwysterau newydd eu cyflwyno, mae myfyrwyr sy'n sefyll yr arholiadau yn ystod yr ychydig flynyddoedd cyntaf yn debygol o ennill marciau is na myfyrwyr a safodd yr hen arholiadau, lle'r oeddent yn fwy cyfarwydd â nhw. Mae'r pwyllgor dyfarnu yn defnyddio'r holl wybodaeth sydd ar gael iddo i nodi pa addasiad sydd ei angen i ganiatáu ar gyfer yr effaith hon. Pan geir tystiolaeth, mae ffiniau graddau yn debygol o gael eu gostwng er mwyn gwneud iawn am y gostyngiad ym mherfformiad y myfyrwyr hynny sy'n sefyll arholiadau newydd.

Ar ôl ystyried yr holl dystiolaeth yn ofalus, mae'r pwyllgor dyfarnu yn argymhell y marc isaf sydd ei angen ar gyfer pob gradd i sicrhau bod y safonau gofynnol ar gyfer eleni yr un peth ag ar gyfer blynyddoedd

blaenorol. Yna mae'r bwrdd arholi yn cynnal gwiriadau ansawdd i sicrhau bod y pwyllgor wedi ystyried yr holl dystiolaeth sydd ar gael ac y gellir cyfiawnhau'r penderfyniadau o ran ffiniau graddau. Yna caiff y ffiniau graddau terfynol eu hadolygu a'u cymeradwyo gan swyddog cyfrifol y bwrdd arholi. Yna mae'r bwrdd arholi yn prosesu'r ffiniau graddau hyn ac yn cyfrifo'r radd y mae pob myfyriwr wedi'i chyflawni.

Mae'r broses hon yn golygu y dylai myfyriwr sydd wedi perfformio i'r un lefel gael yr un radd, p'un a wnaeth eistedd yr arholiad eleni neu y llynedd. Pan gaiff yr arholiadau eu sefyll yng Nghymru, goruchwylir y broses gennym ni, Cymwysterau Cymru. Pan gaiff yr arholiadau eu sefyll ledled Cymru, Lloegr a Gogledd Iwerddon, goruchwylir y broses ar y cyd gan y rheoleiddiwr cymwysterau ym mhob gwlad.

Am ragor o wybodaeth

Mae gan bob bwrdd arholi wybodaeth ac animeiddiadau defnyddiol ar eu gwefannau sy'n rhoi manylion pellach am y broses hon.

